

摘藻堂四庫全書薈要

經部

欽定四庫全書薈要

經部

日講易經解義卷七

詳校官祭酒臣韋謙恒



欽定四庫全書薈要卷四百四十三

經部

日講易經解義卷七



震下
乾上

无妄之謂誠以天道言實理之自然也。以聖人言實
之自然也。震者動也。動以天為无妄。動以人則妄。

矣。彖傳釋卦辭曰：剛自外來而為主於內，剛德在內，
心不妄也。為震主動，不妄也。動而健則勇於義而不
屈於物欲。九五以剛居中，在已正也。下應六二柔順。

中正所應正也正則天命之當然也匪正則違乎天命之正而不可以有行矣對時育物先王亦順天時而已何有妄焉初之吉二之利其无妄也一時也三之災四之貞五之疾上之眚亦非有妄以致之也亦一時也時當動而動不當動而不動所謂動以天也所謂正也彖辭於利貞之下即繫以匪正有眚不利有攸往明无妄之不可不出於正也又辭於无妄之極亦繫以无妄行有眚无攸利明執一不變者即匪

正而妄也然則彖言全體爻言一節其無不以正垂訓也意深切矣有无妄之實心者可不審時以趨於正也歟

无妄元亨利貞其匪正有眚不利有攸往

此卦震下乾上本天而動動而不妄故為无妄卦辭言心出於正則隨感而皆通稍涉於妄則往行而有礙也无妄實理自然之謂匪正謂不合正道也文王繫无妄彖辭曰盈天地間惟此真實之理而已卦變

剛來而為震主其心純乎天理動而皆實卦德震動
乾健卦體剛中而應則德既純一而誠能動物此无
妄之所以元亨也然其所以亨者利於至正耳若知
有未至理有未窮而以偏倚之見行之則自信為正
者政匪正之所伏也雖无妄心而不合於自然之理
即匪正矣匪正則災眚隨之以之處事應物徒有紛
擾之患而安能利有所往哉按无妄即所謂誠誠則
自無不正而又勉以利貞何也蓋人無格物致知學

問思辨之功則有志在祛妄而反墮於妄本欲從正而反悖於正者以此自治必有言偽而辨行僻而堅之失而受病在一身以此治人必有不諳物情不識時宜之弊而受病在天下從來妄之溺於利欲者易見妄之溺於意見之偏學術之誤者難知惟其難知是以果於自用輕試之世道民物而貽害無窮也宜聖人極論而深戒之歟

彖曰无妄剛自外來而為主於內動而健剛中而應大

亨以正天之命也其匪正有眚往无妄之往何之矣天命不祐行矣哉

此彖傳是釋无妄彖辭以明无妄則應天之命匪正則失天之祐也内外以六畫之卦言下三畫為内上三畫為外以三畫之卦言下畫為内上畫為外凡畫卦者自下而上有由内及外之義也剛中指九五何之言無所往也祐助也孔子釋无妄彖辭曰卦之名為无妄者以卦變剛自訟之二來而居初則天德之

剛不馳於外而還為一心之主此中渾然一无妄也
卦德震動乾健既有震動之才而不屈於物欲之擾
所主之剛不因動而移也卦體五之剛中下應於二
既有實意之孚而不涉形迹之偽所主之剛不因應
而私也无妄如是理宜大亨而必利於以正者蓋以
天之賦命於人本無不正之理而人之受命於天必
盡去邪妄之私斯人之妄去而天之命見矣所謂其
匪正有眚不利有攸往者以正則可行而匪正則不

可行乃猶自以為无妄而欲往焉動而輒阻又何之
矣失其所主之剛而悖乎天命之正其何以獲祐而
行之哉蓋天人無二理總不出於一誠所以惟命不
于常惟德為有常若無无妄之實而逞其私智妄意
天命可異其不流於後世圖識之說幾希矣聖人之
書不且為奸雄嚆矢哉

象曰天下雷行物與无妄先王以茂對時育萬物

此象傳是言先王體无妄之象以盡參贊之道也茂

盛也對時順合天時也萬物之物無人言孔子釋无
妄象曰卦體乾上震下為天下雷行之象雷行於天
下陰陽交和相薄而成聲正發生萬物之時天所賦
與洪纖高下各正其性命無有滲漏是隨物而皆與
以无妄之理先王法天理物以為天之无妄不可見
其可見者時也受天之无妄以成形者物也本至誠
充積之衷以對天時而順序布和以育萬物而省刑
弛禁則時與物皆歸无妄之中而先王亦惟順承夫

天命而已矣按尚書有羲和之命周禮重教養之條
皆本无妄之念以對時育物使各得其性而已若稍
涉妄念如漢武之封禪梁帝之戒殺又奚足法焉為
人君者其務以聖帝賢王為則哉

初九无妄往吉象曰无妄之往得志也

此一爻是言无妄之初動與天合者也无妄以心言
往吉以事言周公繫无妄初爻曰初九剛自外來而
為主於內是其中心誠實過人欲之萌存天命之正

而又在卦初上合九四兩剛相遇不牽於係應之私
无妄者也但居動體之下理無不往然初非有心於
往也至誠所感而物我交通此以誠求彼以誠應何
吉如之孔子釋初象曰所謂无妄之往者蓋天下惟
誠能動物初志存於无妄以之處事則順而祥以之
臨人則感而化又何往而不得其志哉大抵身世之
扞格皆由私見之未除无妄則一實理相感召所謂
至誠而不動者未之有也聖賢之待物帝王之御世

總不出一誠而已矣

六二不耕穫不菑畲則利有攸往象曰不耕穫未富也
此一爻是言六二任天而動不襍以人欲之私也耕
春耕穫秋收菑開田畲成田一歲之農始於耕終於
穫三歲之田始於菑終於畲未富無求利之心也周
公繫无妄二爻曰凡理之自然而然者非妄也心之
有為而為者乃妄也二柔順中正又上應五之中正
居動體而能順乎中正實能无妄者也其於天命之

正所宜盡者純其心於无間而絕無求得於外之心
辟之耕穫菑畲皆求得於外者也去其耕穫菑畲之
心而後可還其无妄之本體故有不耕穫不菑畲之
象然有无妄之心亦有无妄之福二能如此福澤自
至則有所往而自無不利矣孔子釋二象曰所謂不
耕穫者二之立志淡漠泊乎無營絕不念及於利而
為之則无妄之心一如未富之心也漢儒董仲舒曰
正其誼不謀其利明其道不計其功人但盡所當為

而已利害得失豈足營心乎然不正誼則已正誼則利必歸焉不明道則已明道則功必集焉又屬一定之理以此在下則孔子所云寡尤寡悔祿在其中以此在上則大舜之有天下不與而祿位名壽之必得此六二利有攸往之旨也

六三无妄之災或繫之牛行人之得邑人之災象曰行人得牛邑人災也

此一爻是言六三處不得正而致无妄之災也邑人

謂居者周公繫无妄三爻曰三以陰居陽不中不正處下之上則居非其地應上之剛則遇非其人是无妄而有災者也然天下事有失則有得乃三處得失之外而獨撓其災此蓋出於尋常意計之外者象猶或繫之牛行人牽之以去而居者反遭詰捕之擾也君子於此亦惟聽之適然之遭以順受乎天命之正已爾孔子釋三象曰得之所在災亦及之此人所及防也行人得而邑人災此蓋有不及防者君子於此

惟有順以聽之而安能預為避患之計乎按六二得位而有无妄之福六三失位而有无妄之災皆時為之也如李泌周旋肅代之朝深為小人所忌而得以功名終此无妄之福也陸贄竭知盡忠濟其君於險難卒以被讒而斥逐此无妄之災也君子亦惟盡其在我而禍福不以動其心庶全乎天之正命矣

九四可貞无咎象曰可貞无咎固有之也

此一爻是言九四以正道自守而有无妄動之失也有

猶守也周公繫无妄四爻曰四得乾體之剛下無係
應是天德為主於中而物交不引於外无妄不待言
矣然剛則思動動即離於咎幸以九居四絕無過恃
其剛之心故可堅守其剛而事變云為皆不為之動
則天德在我而命亦祐之又何咎之有孔子釋四象
曰四之可貞无咎者蓋以无妄之理去與來其幾甚
微也稍懈即妄矣故必固守而勿失之然後可免於
咎耳按諸卦有以九居四為不正者為其以剛居柔

而損剛正之德有以九居四為可貞者為其以剛居柔則不過乎剛而有可貞之道大抵剛不足則以居陰為戒剛有餘則以居柔為美无妄震動在下乾剛在上此剛有餘者必固守之而後无咎其亦剛柔相濟之義乎

九五无妄之疾勿藥有喜象曰无妄之藥不可試也

此一爻是言制變在乎能靜不可輕動以滋咎也試謂少嘗之也周公繫无妄五爻曰五以中正居尊位

二復以中正應之是君臣道合政治脩明无妄之至者也然世變無常人心叵測或遠人不服而外侮堪虞或奸頑弗率而內化未謐是為无妄之疾設鍼砭過當攻擊太深則毒深而愈不可治故必鎮靜以俟之彼將自然消弭而底於寧晏為勿藥有喜之象所謂不治正所以治之也孔子釋五象曰人之有妄乃宜治之既无妄矣復藥以治之必至傷損國脈胥削元氣而妄反生矣藥其可輕試乎益邪不能勝正而

德可以動天元氣固則疾自平內治脩則敵必服虞
苗之格格於舞羽非格於誓師也周頑之化化於保
釐非化於忿疾也彼躁妄而動動即招尤漢武馬邑
之師太宗征遼之役豈不可以為鑒哉

上九无妄行有眚无攸利象曰无妄之行窮之災也

此一爻是言上剛已過極妄行而取災者也窮極也
周公繫无妄上爻曰上九以陽居卦之終无妄而處
時之極者也極而不知變將自恃其无妄不可行而

行必至有過情越理之失而乖乎天命之正矣昔必
及之而又何利焉孔子釋上象曰所謂无妄之行者
特以勢處於窮決不可有所行耳行則與災會矣三
猶可委其災於人上直自掇其災於已耳此卦六爻
皆无妄初得位而為震動之主時之方來故无妄往
吉上失位而居乾體之極時之已去故其行雖无妄
而有眚无利是故善學易者貴識時初與二之可動
而動時也三四五上之不當動而靜亦時也理無不

可行而時或有所尼君子不得不順時以聽焉此洪範之稽疑所以亦云用靜吉用作凶也



乾下
艮上

大畜之義有二一止畜畜乾也一蘊畜畜德也彖傳兼此二義象傳專以畜德言六爻專以畜止之義言六爻中下三爻乾體皆受畜者也上三爻艮體皆畜下者也然受畜者貴止而不進故初二皆止三利艱貞但初與二已為四五二陰所畜至三為畜極而通

之時又與上皆陽爻不相畜而俱進則良馬之逐自
與初二不同矣畜下者貴防於未然故四能止初惡
於未形而得元吉五則於陽之已進而止之雖言吉
而不如四之元吉也至上則畜極而通之時強暴盡
除反側盡平而治化洋溢乎四海則天衢之亨又與
四五不同矣合而觀之凡畜德者非有剛健篤實輝
光之盛不能成日新之德畜惡者非有德禮潛移默
化之機不能臻蕩平之治天德王道聖人於大畜一

卦已盡發明則觀大畜之象玩大畜之辭天下之道
可以旁通而無遺矣

大畜利貞不家食吉利涉大川

此卦乾下艮上以艮畜乾所畜者大故名大畜卦辭
言畜道必出於正然後可以享君之祿而成天下之
功也不家食謂食祿於朝涉大川言能匡濟時艱而
成功也文王繫大畜彖辭曰道之所貴者正君子為
畜之道而可苟哉必精以擇之一以守之使吾之所

畜莫非天德王道之精而不雜於異端霸術之陋則
不徒畜之大而且畜之正矣然徒畜而不知所以適
用是自私也而可乎故必舍其家食之賤以膺天祿
之尊則所畜得以顯其施而利貞之守以達矣何吉
如之然徒出而不能有以自見是苟祿也而可乎故
必當天下之大難以成天下之大功則所畜得以懋
其猷而利貞之效以彰矣何利如之夫大畜利貞體
之所以立也不家食涉大川用之所以行也必有其

體而後有其用信乎畜之貴大而正也此卦有止畜
蘊畜二義六爻中下三爻以君子為小人所畜言上
三爻以君子畜小人言此畜止之義也大象傳以多
識前言往行言此蘊畜之義也彖言人必有大蘊畜
方有大設施故推其所畜之正者以之食祿於朝則
吾道藉以大行以之匡濟時艱則世道賴以安奠似
亦專主蘊畜而言然彖傳又以艮畜乾為能止健則
未嘗不兼畜止之義當是具此二說故聖人謂智者

觀其彖辭思過半矣以見彖之無所不統也

彖曰大畜剛健篤實輝光日新其德剛上而尚賢能止健大正也不家食吉養賢也利涉大川應乎天也

此彖傳是釋大畜彖辭以明所畜之正而大也孔子釋大畜彖辭曰卦何以名大畜哉蓋德具於心而見於事者也卦德內乾是主於內者天理精純而不雜德性常用而不撓何如其剛健也外艮是見於外者躬行懃切踐履真摯而自然光華發越何如其篤實

輝光也夫內有無私之本體而外有實踐之光輝所
養者日益精明所行者日益堅固德之蘊畜時乃日
新而德為天下之至德矣此大畜之所由名也辭何
取於利貞哉卦變自需來九自五而上是賢者正居
臣位也卦體六五尊而尚之是人君能尊賢禮士也
卦德以艮畜乾是又能禁戢強暴使不為惡也剛上
而不以正則為枉道徇人尚賢而不以正則為恭敬
無實止健而不以正則為化導無方而人不服三者

皆非大正不能然則畜德者可不以正乎此利貞之所由取也辭言不家食吉者蓋大畜利貞既為可尚之賢而六五又有尚賢之象是人君共以天祿養以大烹而賢者得食於朝廷之上矣其不家食吉宜也辭言利涉大川者蓋大畜利貞既具應用之本而六五下應於乾又有應天之義是不先時有為而拂乎天亦不後時不為而逆乎天操縱閤闢不失時行之道矣其利涉大川宜也易之一書以貞為主乾之大

大於利貞坤之大大於永貞畜之大亦大以貞故不
徒曰正而曰大正不正則蘊畜之德不大在吾已非
賢矣欲其君尚而養之不可得也不正則畜止之得
亦不大雖有止健之才欲其應天而濟變不可得也
或謂聖人之道神妙莫測在於權而不在於正不知
行權正以求得夫正耳豈正之外復有權乎

象曰天在山中大畜君子以多識前言往行以畜其德
此象傳是言君子體大畜之象而盡其畜德之功也

多識謂博求而識於心也孔子釋大畜象曰乾天也艮山也天體至大而在山中是大畜之象也君子觀象而知畜德之方焉蓋古人由畜德之盛而時發於言行之間則前言之畢存非繁文也是德之精華也往行之具載非陳迹也是德之實體也君子於是多識前言往行以畜其德焉得古人之言行即得古人之心得古人之心之理即得吾心之理其所畜不亦大哉按多識言行或以為近於口耳之學未免玩物

喪志不知本末精粗道原一貫言行在外而其理根
於心心德在內而其實寓於言行故為學者必居敬
涵養以為主而又博聞廣見以為資師心而不師古
好悟而不好學豈善畜德者乎書曰人求多聞時惟
建事學于古訓乃有獲帝王聖賢無二學也
初九有厲利已象曰有厲利已不犯災也

此一爻是言君子進則有危當以義命自安也厲危
也已止而不進也周公繫大畜初爻曰初九為六四

所畜而又以陽剛居乾體之下剛銳喜進久為小人所側目宜有厲者也倘復冒昧以往必蹈危機厲其能免乎惟健而能止則沈幾觀變安乎義命之常以為時未可為不妨藏器以有待也全身遠害何利如之孔子釋初象曰災自外至者也人自犯之耳苟身履危困而諉為命之不猶晚矣若初之知有厲而能已是其委蛇順時不至犯小人摧抑之災也按君子出處不可不審非獨為小人所畜當止而不進即為

小人所引而輕身就之終必有害蓋一有急於用世之念往往忘慮患持難之心也先儒謂乾陽上進不有以止之則其神不定其守不粹故皆以止為義大畜之初九其即乾之潛龍乎

九二輿說輶象曰輿說輶中无尤也

此一爻是言君子守正不往而能自全其道也輶伏於軸以承輻者輿說輶謂自去其輶而不進也尤過也周公繫大畜二爻曰九二陽剛其才足以有行者

持為六五所畜而未可以進二則能以中道自裁審
時揆勢止而不行脫然於馳逐之場而無妄動之虞
為輿說輟之象則時不當行而即不行所謂可以止
則止者也孔子釋二象曰輿說輟而不行者二有中
道故能察乎時之盛衰勢之強弱則進退不失其正
而躁動之尤何自而至乎按輿者行之具二已在輿
是勢在必行而自說其輟則遂止而不行矣凡尤者
咎自外來當不可之時而強為天下任事則僨輅之

患將欲誰諉二能說輒以自審非萬全勿動也又何尤焉其殆審幾達務之君子乎

九三良馬逐利艱貞曰閑輿衛利有攸往象曰利有攸往上合志也

此一爻是言君子遇可進之時尤宜審慎以善其進也逐偕行也曰當作日閑調習也衛防衛也上謂上九周公繫大畜三爻曰三居健體之極又遇上九以陽處畜之極志同德孚乃不相畜而與上共進以馳

驅乎王事有良馬逐之象然三不慮其不進但慮其恃剛過銳而無周慎貞固之力則必有欲速輕動之咎故利於艱難其事而貞固其守如輿所載以行也而衛所以防行之具必日日閑習之使手與器相習而心與身交慎則出也不苟而進也有為攸往之利於三見之矣孔子釋三象曰初則利己二則說輟而三獨利有攸往者以乾陽本欲上進但恐在上無合志之人不能展其素具今三與上皆陽剛上之志合

乎三之志而同類感通相為汲引又何嫌何疑而有
不幡然竝進者乎按三負良馬之材可以馳驟天衢
因其過剛不中故有艱貞之戒而教之日閑輿衛可
見君子出任天下之重必臨事而懼如弗克濟然後
可遺大投艱而無患不然恃才以騁而顛蹶失防一
已之身名不足道矣而悞人家國之託其罪豈可贖
哉

六四童牛之牯元吉象曰六四元吉有喜也

此一爻是言遏惡者當於未萌不使其發而難制也
童者未角之稱牯施橫木於牛角以防其觸也周公
繫大畜四爻曰六四艮體而與初相應畜初者也初
居最下陽之微者微則其惡未形而制之甚易潛消
默化猶牛未角而牯以防其觸之象夫人之惡當既
著而後禁則扞格而難勝及其初而豫防則人自不
為惡而并泯其禁之之迹矣所謂以禮立教不煩刑
誅大善而吉之道也孔子釋四象曰惡已章而治之

雖亦足以禁奸戢暴而不免於刑戮之慘其於心當有所大拂也四之止惡未形而元吉蓋豫教而民自服無為而物自化四之心蓋有所深喜乎此也記有之禁於未發之謂豫人未有爭心而設禮樂以教其讓人未有欲心而懸法制以禁其邪開其向善之端而杜其為惡之路此所謂豫也夫四與五皆以止下之惡論成功之廣狹四不如五之廣故五曰有慶而四曰有喜論用力之難易五不如四之易故五曰吉

而四曰元吉五不如四之易者其時不同而四不如五之廣者其位不同乎

六五豮豕之牙吉象曰六五之吉有慶也

此一爻是言六五止惡有術而慶被於天下也豕謂牡豕攻其特而去之曰豮所以去其勢也周公繫大畜五爻曰五居君位而畜二二之剛已進而欲止之是其惡已形而勞於制矣幸五以柔居尊操之有其要而御之得其術使之知廉恥黜奇邪而自回心革

面如患豕牙之剛不制其牙而殲去其勢有牙雖存而剛自止之象如是則用力不勞而刑清民服何吉如之孔子釋五象曰為民上者不知止惡之方而惟淫刑以逞惡未能制而天下已受其害矣六五之吉蓋知其本而制之有道不必徒事禁防而風移俗易福慶被於生民矣按漢之趙張設鉤鉅捕盜賊豈不能使奸人屏迹君子以為不如潁川之教化渤海之勸諭秦之商君刑棄灰制連坐豈不足戢為惡之志

君子以為不若虞之化讒說周之感頑民趙張之於牛不牯之以童而惟治其觸商君之於豕不去其勢而欲制其牙故也

上九何天之衢亨象曰何天之衢道大行也

此一爻是言世運當亨通之會而王道自大行也天衢天路也周公繫大畜上爻曰上以陽剛處畜極而通之時是陽氣久鬱而伸陰氣久凝而散奸回盡殄反側盡平皇路廓清絕無阻礙有何天之衢之象當

此之時不必制惡而自無惡可制治化翔洽而頌聲
丕應亨莫加於此矣孔子釋上象曰所謂何天之衢
者以時與道合也天運無處不昌王化無處不浹蓋
政教四達而治於此觀成矣其道之大行也何如哉
大畜上三爻所以畜下三爻者也四之牛牯其角五
之豕豮其牙雖所畜有難有易而皆不能不用其力
至上畜極而通則無藉刑驅勢禁而為惡者自相感
而化是剛明之臣遇尚賢之主可共濟天下之險而

坐收涉川之功矣故曰何天之衢訝之也實喜之也夫不言其難不見畜之力不言其易不見畜之之成所謂蕩蕩平平無反無側至治之盛其在是乎



震下
艮上

頤取養之義彖辭言養德養身皆出於正則吉彖傳既釋養正之義復極言養道之大而象傳又舉養德養身之切務以示人也六爻上止下動故下三爻為自養上三爻為養人震性動動皆累於欲不能自求

所養而求人以養己失養之道矣故下三爻皆凶艮
性靜靜則得其正求於人以養其下雖不免於顛拂
而於養道無失故上三爻皆吉此彖辭之所以言利
貞也天地以時養萬物聖人得時則養賢以及萬民
利天下而非以自私也故言頤之時大矣哉君子之
自養也知棄我良貴悖理求祿之匪正則知砥節礪
行之為正矣知下媚上援干求非類之匪正則知不
瀆不諂之為正矣知簞簞不飾縱欲敗度之匪正則

知靜儉節制之為正矣此自養之道當如是也若夫
以上下下誠信任賢人臣之吉也養賢及民民被其
福人君之貞也任大責重饑溺由已有相之道也此
又養人之得其正者也故動不自動而止其所止則
頤之道盡矣

頤貞吉觀頤自求口實

此卦震下艮上上下兩陽中含四陰外實內虛上止
下動有頤之象故名為頤卦辭言頤有養義養出於

正則身心皆獲所安而得吉也頤口旁也文王繫頤

彖辭曰頤之為言養也為卦震動在內艮止在外恐
內之或動於情偽之感而心之養不得其正外之或
止於嗜欲之安而身之養不得其正惟得正則身心
皆得其養而吉然出於正即入於不正危微之幾介
於毫髮故善養者必靜觀而內求之其養德也果合
於聖賢之道而無異端以淆之則心正而頤正矣其
養身也果當於義理之節而無饑渴以害之則身正

而口實亦正矣蓋正則得吉不正則不得吉頤之所
為必出於正也按程傳謂觀頤為觀所養之人自求
口實為自求養身之道蓋下體三爻皆主自養上體
三爻皆主養人上體則觀其養人者得正則吉下體
則觀其自養者得正則吉也與本義專主養德養身
不同其實自養為養人之本未有自養不正而能養
人者真德秀云已得其養則吾身先成然後可推而
達之天下是也本義專言其體程傳兼明其用解雖

各異義實相通總以見易道之無不該而已

彖曰頤貞吉養正則吉也觀頤觀其所養也自求口實
觀其自養也天地養萬物聖人養賢以及萬民頤之時
大矣哉

此彖傳是釋頤彖辭而極言養道之大也所養養德
自養養身孔子釋頤彖辭曰頤以貞而吉者蓋養必
以正在心常獲天理之安在身無復物欲之擾則吉
也稍不正則不得吉矣辭謂觀頤者在觀其所養之

道其於性命之正純然無雜而浩然之氣不為之撓
則德得正而吉也辭謂自求口實者在即其所養之
道以觀其自養之術其於義理之正凝然不擾而口
體之奉不為之動則身得正而吉也養正之道如此
推之而天地聖人寧外於是哉夫天地本以養萬物
者也苟失其正必至氣候失宜疵厲橫行而物有不
遂其生者矣聖人本以養民者也苟失其正必至賢
奸混雜舉錯失當而民有不安其命者矣故天地養

萬物聖人體天地養物之心養賢以及萬民而皆出之以正則頤之時詎不大矣哉從來養萬物者天地而代天地養萬物者必屬之聖人然聖人欲養民非先養賢勢不能偏故不直曰養萬民而必曰養賢以及萬民也唐虞之廷禹平水土稷降播種契敷教皐陶明刑九官十二牧亦止完一養民之事而已仁者無不愛也急親賢之為務豈不信哉

象曰山下有雷頤君子以慎言語節飲食

此象傳是實言君子養德養身之切務以明養道之正也孔子釋頤象曰此卦震在艮下是山下有雷震動發生物由此養頤之象也君子觀象以求養正之道而知德之不正由言語以為之階慎之而言必當理語必合義是言語皆養德之具而無妄出以招禍矣身之不正由飲食以亂其性節之而飲必德將食必正味是飲食皆義身之物而無妄入以致疾矣養正之道不於頤備之哉推之有天下者命令政教皆

由言語之頒資用貨財無非飲食之事其養德養身者愈大則慎之節之者愈難所以古之君子誦白圭之什識金人之銘旨酒必惡飲食必菲兢兢乎謹小慎微無一端不合夫養之正而後可為天下後世之觀法也夫

初九舍爾靈龜觀我朵頤凶象曰觀我朵頤亦不足貴也

此一爻是言夫靜養之正而動於利欲之私也爾謂

初也靈龜不食之物我謂四也朶垂也朶頤欲食之貌周公繫頤初爻曰初以陽居下本有剛明之德養息深靜而無外慕者但居動體上應六四不能以剛自守而反上從四之柔則私欲熏其心爵祿嬰其慮而本體之靈棄之若罔恤焉猶舍爾以氣自養之靈龜觀我而朶其頤之象也如是則失其靜養之道而溺於動養之欲沈迷不反何所不至其凶可知已孔子釋初象曰所謂觀我朶頤者以初之剛本為可貴

而累於動體從欲而動則將淪於污賤而可羞矣亦何足貴哉蓋士君子立身於理欲之介不可不慎故有以一朝之失足而遂遺千載之恨者矣此無他物重而我輕也孟子曰人人有貴於己者弗思耳誠知在己者有甚貴而世間之利欲豈足動其心乎

六二顛頤拂經于丘頤征凶象曰六二征凶行失類也此一爻是言失求養之義故上下皆無應也顛頤求養於初也拂經違其常道也丘土之高者上之象也

丘頤求養於上也周公繫頤二爻曰陽剛養人者也
陰柔養於人者也二以陰柔不能自養必求養於陽
剛若下求於初是在已乏資身之術而俛首恭養於
卑賤之流則顛頤於下而拂以上養下之常道矣若
求養於上又非正應是才不足以自養見上之權力
足以養人而奔走趨附以從之則彼有丘陵之勢而
我徒遭摧壓之凶矣是一則於理有所不可一則於
勢有所不行故均不能有濟也然則人可不自重哉

孔子釋二象曰六二不得於初而往從夫上亦復得
凶者以二處非其地上下皆非應與但宜止而弗行
也行則皆失其類得凶宜矣按程傳謂女不能自處
必從男陰不能獨立必從陽二陰柔不能自養待養
於人固天地間之定理然去就之正不正則已得而
自主者也夫上而事君下而交友倘以利祿縈心而
希圖仕進舖啜為志而攀附交游則中君羞以為臣
中士羞與為友矣

六三拂頤貞凶十年勿用无攸利象曰十年勿用道大悖也

此一爻是言小人放情恣欲而大違乎頤道之正也
周公繫頤三爻曰三陰柔不中正又居動體之極人
皆求頤於上三獨拂之而隨下體之動是性既昏迷
動復躁妄其所為頤者不過沈湎於嗜慾放恣於口
體而拂乎養之常道矣雖飲食亦日用之正猶不免
於凶必至沒身沈溺而聲名俱喪十年之久終不可

用無所往而利也孔子釋三象曰所謂十年勿用者以頤道貴靜動則悖三處動極則大悖矣任情滅理終身不悔莫恤也夫蓋貧賤不濫富貴不淫乃得頤養之道二處貧賤而不知守約而濫者也三處富貴而不知節樂而淫者也夫吾心不能以義命自主而隨境轉移豈得云養正之大人乎

六四顛頤吉虎視眈眈其欲逐逐无咎象曰顛頤之吉上施光也

此一爻是言六四能求賢以養民而復示以用賢之道也顛頤求養於初也眈眈虎下視貌虎視眈眈下而專也其欲逐逐求而繼也周公繫頤四爻曰四以柔居正而下應初之剛正是居上而能信任乎下者也然陰柔不足以及物必藉初之賢以成功則養人者初也而任賢以養人者唯四故為顛頤而吉也是四之於初固已能下之能求之矣第患下之不專則賢者生疑而養之道未弘求之不繼則施為未竟而

養之功易竭必能誠信不二而專始終無間而繼如

虎之視眈眈而欲逐逐焉則於求賢養民之責無忝
矣而又何咎之有乎孔子釋四象曰四之顛頤而得
吉何也蓋上之於下不必恩自己出然後謂之能養
也今能任初之賢以養民焉則初之施即四之施而
恩膏所及昭然其光顯矣此其所以為吉也歟按四
居大臣之位有養民之責然一身不能獨理必分其
任於庶司百職而後可共成治功此其虛心下賢深

合乎以人事君之道也或謂上施之上指五而言蓋
人臣承流布化無非奉行朝廷之德意譬諸日月之
照臨雷霆之鼓動雨露之滋潤寒暑之成實無非為
天地養萬物而已謂初之施即四之施可也謂四之
施即五之施又何不可哉

六五拂經居貞吉不可涉大川象曰居貞之吉順以從
上也

此一爻是言任賢足以圖治而又當凜不自用之戒

也拂經謂以君而從臣也上謂上九周公繫頤五爻

曰五以柔居尊位才不足以養人上有陽剛之德五
賴其賢以養之夫君以養人頤之經也反賴上之養
以養之是拂於經矣既以已之不足而求養於上必
居守貞固篤於信任斯惠澤常流而得吉也若不能
審已度力或以拂頤為嫌而冒昧以圖功自用以求
濟是猶涉大川而無操楫之任何由而克涉哉孔子
釋五象曰居貞之吉者謂五不恃其尊能柔順以從

上九之賢而毫無勉強此誠得養賢以及萬民之道
故居貞而吉也按君道貴剛柔所不尚然柔而能任
剛明之賢則不獨資以自養而天下亦賴之如太甲
成王雖不及湯之錫勇武之執競而能信任尹虺周
召之賢則未始不可成治功也至若漢元優柔不斷
知蕭望之周堪之忠而不能用知弘恭石顯之惡而
不敢去進賢如轉石去佞如拔山是其柔也必至於
莫揀矣故曰君道以進賢退不肖為大

上九由頤厲吉利涉大川象曰由頤厲吉大有慶也

此一爻是言上九以養民為已任而天下胥受其福也。由頤由之以養也。周公繫頤上爻曰六五賴上九之養以養人是上以有相之道而致羣黎康乂之休。民生未遂由以遂之。民性未復由以復之。有由頤之象。臣而若此。則位高權重。寧可以易心處之乎。故當皇皇惕慮。惟恐上孤君心。下失民望。乃能勝其任而得吉也。然以上九陽剛則有能為之才。在上則有得

為之勢乘其勢而運其才雖養民極天下之大事自
可一身弘濟之而有餘而不負君上之倚毗矣夫何
涉大川之不利哉孔子釋上象曰養民者以澤被天
下為慶以上之躬膺大任果能宅心兢畏以成養民
之功則一時受其利萬世蒙其澤而功之所被者溥
矣非大有慶乎按豫九四曰由豫由豫在四猶下於
五也而已有可疑之迹若頤上九曰由頤上之所處
過中而益嫌於不安其可不存兢惕之心哉然艮止

之性必無暴戾以招凶自以仁德而致慶故雖厲而終得吉為人臣者投艱遺大則以身肩任之及事定功成而威福還諸朝廷功名歸於人主斯有譽而无咎矣



巽下
兌上

卦以四陽過盛而名大過處過之時貴有救過之道必剛而得中內巽外說則可以抑中強之弊而扶本末之弱雖過而不過矣六爻相對而實相反三四居

全卦之中皆有棟象上則隆下則撓也二近初陰五
近上陰皆有枯楊之象上則華下則稊也初過於敬
慎而有藉用白茅之安上過於有為而有過涉滅頂
之凶一承剛一乘剛也就四陽而言二四以剛居柔
處過而不過者也故一吉而一利三五以剛居剛處
過而太過者也故一凶而一可醜司馬光云太過剛
已過矣止可濟之以柔不可濟之以剛也故大過之
陽皆以居陰為吉不以得位為美其道主於默運轉

移而不在於較蹕駿厲蓋過柔固不足以有為而過剛亦甚足以僨事自古立非常之大事興不世之大功皆時勢所迫出於萬不得已起而挽回補救非小心翼翼者不能故卦於陽之盛也有危辭而六爻亦無全吉者惟初以慎之至乃得无咎彖辭則言救過之道而即歎其大皆聖人之慎言之也

大過棟橈利有攸往亨

此卦巽下兌上卦體四陽居中用事陽氣過盛故名

大過卦辭言時當極盛非材弱者所能勝其任惟剛而得中乃可以濟過而有為也棟今謂之橑橈弱也文王繫大過彖辭曰卦體四陽居中棟之象也上下兩陰柔而無力不勝其重則委靡之才不克擔當大事有棟橑之象必如卦之剛中而巽悅善用其剛而不過以是而往則以大過人之才行大過人之事必能通其時之變而克勝大過之任者矣故利有攸往而得亨也蓋人君之保邦猶大匠之作室大匠必得

榱桷杞梓之材而後可成巨構人君必得舟楫鹽梅之佐而後可建大功否則用違其量以杙為楹以蒿代柱將見棟折榱崩覆壓是懼何以享莞簟之安乎故曰有非常之人乃有非常之事荷重任者亦勉之而已

象曰大過大者過也棟撓本末弱也剛過而中巽而說行利有攸往乃亨大過之時大矣哉

此象傳是釋大過象辭以明大過之時非有大過人

之材不能濟也大者過謂陽過也本謂初末謂上弱
謂陰柔中謂二五孔子釋大過彖辭曰卦名大過者
易以陽為大今四陽居中過盛則世道有盛極將衰
之漸故為大者過也辭曰棟撓者何哉蓋大過之時
以一身任天下之重猶屋之棟然必賴陽剛之力足
以維持之而後無傾敗之患卦體初上二陰本末皆
弱既不能自強其德以固其本又能力挽其失以
扶其末此其所以撓也又曰利有攸往亨者何哉蓋

天下無不可為之事惟患人無善為之道卦體四陽雖過而二五得中是強毅過人固足以幹事矣而又出以時措之宜卦德內巽外悅是思慮嚴審固足以通變矣而又行以和順之美卦有大過人之才如此以是濟時之過則經綸有方可以長保其盛而不至於衰此其所以亨也夫惟有剛中巽悅之才然後利往而得亨可見非常之時必有非常之人方能處之而有濟大過之時豈不大矣哉夫大過之時何時也

正天地平陂之會帝王升降之關所謂彌綸經緯古今極大事業如堯舜之揖讓湯武之征誅然亦不過順時而為之並未於時外剏造一事否則寧傳子不傳賢矣寧守節不達節矣後世君臣喜功好大但見外之有餘而不量中之不足罄民財而不惜竭民力而不止以至傾敗而不可救此秦皇漢武之貽悔無窮也當斯任者其可漫然處之哉

象曰澤滅木大過君子以獨立不懼遯世无悶

此象傳是言君子觀大過之象以自純其無憂懼之心也澤滅木謂木在澤下也孔子釋大過象曰澤本可以潤木乃至浸滅乎木澤水之大過也故為大過之象君子體之而有過人之行焉彼獨立而人不我輔人多懼心君子當為則為雖一國非之而不顧天下非之而不顧又何懼焉不懼則過人矣遯世而人不我知人多悶心君子以道自樂不以非分之富貴易我不去之貧賤又何悶焉无悶則過人矣此非

見之甚真守之甚定學術操守卓絕乎人者不能君子之異於人若此昔人謂獨立不懼吳木之象周公以之遯世无悶兌悅之象顏子以之然周公顏子非強致而然周公之處常也夔夔然存恭敬之心故遇變也几几然無禍患之慮惟其知懼而後能不懼也顏子之居心也不以簞瓢改其樂故處遇也不以屢空動其中惟其樂天而後能無悶也是以君子不治境而治心不求世而求已

初六藉用白茅无咎象曰藉用白茅柔在下也

此一爻是言初能過慎以自全而安柔下之義也白茅物之潔者周公繫大過初爻曰初以陰柔居巽之下過於畏慎者凡圖事濟時處之至安而常懷不安之慮居之甚全而恒厯不全之心猶物之錯於地而必藉以白茅者然夫茅之為質最柔白之取義至潔以柔順居其德而以精白勵其心慎斯術也以往可以常保其安而无過咎何由及之哉孔子釋初象曰

初之藉用白茅者以陰柔在下上承四剛勢不得不過於慎幸其能柔則無矯率豪縱之氣在下則有沈潛精入之思此誠慎而不失於過者也按象言獨立遯世非過亢也見君子植節之偉初言藉用白茅非過謹也見君子慮事之周蓋天下莫不敗於輕忽成於兢業誠能心存畏慎一舉一動必思出於萬全則何險難之不可平而紛錯之不可理可見欲建天下之偉節未有不極天下之小心者也

九二枯楊生稊老夫得其女妻无不利象曰老夫女妻過以相與也

此一爻是言二能用柔濟剛而相與以成大過之功也稊根也老夫即二女妻謂初也周公繫大過二爻曰二當陽過之始其雄心壯氣常足以僨事而有餘幸居柔得中无應於上而下比初六資初之柔以濟其剛自能固本而不撥補偏而不廢以圖事於有濟者也象之物則為枯楊生稊而發生之有機象之人

則為老夫女妻而生育之有賴枯而復榮老而資少
過而不過者也何不利之有孔子釋二象曰大過之
時患人之不我與耳今二之於初如老夫之悅少女
少女之順老夫陰陽相與何事不諧豈復患剛之太
過而不能成相濟之功乎按四陽居中用事力厚勢
強而不知陽太盛則陰竭陰竭則不能以資陽九二
陽過之始而初陰承之相比親切猶可以濟其偏而
補其弊為治者誠知此義勿徒專事恢廓恃其外之

揮霍有餘而虛懷下人以求助其所不足則可以集天下之益而收天下之功矣

九三棟撓凶象曰棟撓之凶不可以有輔也

此一爻是言三過恃其剛而人莫為之輔也周公繫大過三爻曰九三以剛居剛而不得中剛之過甚者也以過甚之剛而當大過之任是剛復自用而違時拂衆必至傾敗而一無所濟故為棟撓之象而凶也孔子釋三象曰所謂棟撓之凶者以三剛強自用視

天下皆無可輔之人人亦不樂進而輔之蓋知其勢之必至於覆壞而不可以有輔也按卦辭以二陰不能勝重故曰棟撓九三過乎陽而仍棟撓之象且加以凶者何也卦之棟以陰不足而撓三之棟以陽太過而撓不足者猶可輔故不言凶太過者難為助其凶必矣甯羸論陽處父曰剛而主能怨之所聚夫剛則難親矣而又主能焉是訑訑之聲音顏色拒人千里之外忠良之士日退讒諂之人日進未有不凶於

家害於國者也是可為深戒矣

九四棟隆吉有它吝象曰棟隆之吉不撓乎下也

此一爻是言四能勝大過之任而不可昵於私應也
隆隆起也下謂初周公繫大過四爻曰九四居近君
之地當大過之任以陽居陰剛柔合德而又處兌下
是能悅君心柔懷億兆何事不可為何功不可建
如棟之隆起而得吉也但濟大過以剛為主過剛而
濟以柔則可今九四非過剛者而下與初應復以柔

濟之則反過乎柔不足以成天下之事而為有它之
吝矣孔子釋四象曰四之棟隆吉者蓋太剛則折斯
不足以任重而撓乎下者有之今四以剛居柔過而
不過所以能勝重任不至撓敗而吉也按九二比初
則無不利九四應初戒之以吝者蓋剛固不能不資
柔以相濟而亦不可牽係於柔以害其剛故於二既
明其相濟之利而於四復著其牽係之害也夫所貴
大臣者以其正色立朝不可攀援而後能仔肩天下

之重苟悅小人之柔媚而親比之其不為所連累而自損功名者罕矣可不戒歟

九五枯楊生華老婦得其士夫无咎无譽象曰枯楊生華何可久也老婦士夫亦可醜也

此一爻是言五當大過之時比於陰柔之小人而無足與有為也老婦謂上六士夫即九五五在上六之下少於上六故曰士夫周公繫大過五爻曰五以陽剛中正而居尊位宜足以勝大過之任矣然下無正

應無與共成大過之功而上比過極之陰其所近者
皆庸懦之臣柔弱之士其不能相濟以有為可知象
如枯楊生華上雖華秀無益於枯也老婦士夫非其
匹偶終不能育也雖一時無撓敗之咎而當大過之
時君亢於上臣靡於下以是為濟過之道寧有譽乎
孔子釋五象曰枯楊不生稊而生華旋復枯矣安能
久乎是不能實心任事而國本先搖也老婦而得士
夫生育無其基寧不可醜是將見譎諛成風而終於可

羞也按君之有賢臣如車之有輪鳥之有翼車無輪不可行遠鳥無翼不可高飛君無賢臣何以建不拔之基流無窮之譽乎大過九五專為有君無臣而言然自古為治未有借才異代者亦顧用之何如耳知之極其明位之極其當循名責實以考其成信賞必罰以鼓其氣則人人興事赴功賢者以奮不肖者以勉苟有一長莫不樂為朝廷之用而何至有乏才之嘆哉

上六過涉滅頂凶无咎象曰過涉之凶不可咎也

此一爻是言天人交困之日唯當盡力之所能為而不可以成敗論也過涉勇於涉也滅頂水滅其頂也周公繫大過上爻曰上以陰柔而處過極之地是當國事艱難之秋既不敢委於時勢之不可為又不敢量其才力之不能濟真所謂竭忠盡智以死繼之者也象如勇於涉水至滅頂而不悔焉此殆以身殉天下之事而有凶矣然其心存効節志在成仁無媿於

見危授命之義又何咎焉孔子釋上象曰君子幸而成天下之事當論其功不幸而殉天下之事當諒其心上六過涉之凶事雖不濟而其心則已盡矣後之尚論者寧可以其不能濟而追咎之乎蓋大過之極非有大過人之才不克濟上以柔正之德而遇極否之時任過其力至鞠躬盡瘁之死而靡悔於事則凶於義則无咎也夫大過本行權之事而聖人特發守經之義於上六此義明而孔光馮道之徒不得借明

哲保身之說以文其偷生賣國之奸矣



坎下
坎上

坎以一陽陷二陰之中是為坎陷之義凡陽居陰之中者為陷坎水也陷者水之體也坎為險難之象所謂時值艱危雖聖人亦處無可如何之勢其能自必者惟心耳彖傳所言剛中有功乃教天下以存心誠信為出險之法也六爻中如二爻之小有得則盡其道而不遇其時者也四以忠信善道結於君心臣之

能竭誠以勤於下者也五以陽德居尊而時將出險
君之能剛中而運於上者也若夫初之深入於險三
之陷於兩坎上之終極於險是時勢既值其窮而才
德又不足以濟欲以平大難而救大艱曷有濟乎蓋
天下不能無險阻之時聖人貴有出險之用惟秉陽
剛中正之德因時措宜天下有事則定密策決衆疑
以成撥亂返正之功天下無事則畫郊圻固封守以
裕思深慮遠之畧必深宮嘗厯險阻之虞而後薄海

乃有磐石之固此所以坎卦至險而卦辭必言出險之道歟

習坎有孚維心亨行有尚

此卦上下皆坎一陽陷於二陰中為坎重之又得坎焉陷益深而險益重故名習坎卦辭言處險之道惟以孚信居之則心有主而成出險之功也習重習也坎險陷也文王繫坎象辭曰人當重險之來是身已入乎險中而不得免者也所可得而自主者心耳卦

體陽實在中為有孚心亨之象則中有孚信而於坎險之內炯炯不昧者維此一心是心之實處即是心之通處禍至而不搖變來而若適而心亨矣夫心既亨通則險阻之境皆吾順行之境而何險之不可出哉是在險而尚於行而不至終於險中也周易上經以乾坤始以坎離終坎得乾之中爻故中實而為誠離得坤之中爻故中虛而為明誠則心有定主而利害得喪不得而入之明則內無偏執而是非毀譽不

得而汨之故中實者坎之用中虛者離之用也體易者因坎離之中而悟誠明之妙用古聖人之心學實在於此徒為出險云乎哉

彖曰習坎重險也水流而不盈行險而不失其信維心亨乃以剛中也行有尚往有功也天險不可升也地險山川丘陵也王公設險以守其國險之時用大矣哉

此彖傳是釋坎彖辭以明處險之有道而後可以出險也剛中謂二五孔子釋坎彖辭曰卦之名為習坎

者以卦體上下皆坎是為重險險不重則彼險此平
人情尚可趨避習坎則遠近無可避之地智愚無自
脫之人而聖賢之作用見焉卦辭所謂有孚者以坎
象為水水體內實而有常故其流也足此通彼不至
盈溢妄行此即其信也其信無論行於地中有常而
不變即至行乎險阻而不盈如故初何失焉彼人之
處險而信義不失者何以異此故曰有孚也維心亨
者以二五剛而在中則剛實無偽心有主宰自能通

達無碍而亨也行有尚者以其剛中之才而往則至
誠感孚行無不達自能芟除大難而有功也夫處險
則思出險之方而用險還為防險之道天之險高不
可升是也有無形之險矣地之險山川丘陵是也有
有形之險矣王公法天險之無形設為法令制度以
防其未然法地險之有形設為城郭溝池以制其已
然而以守則固國是以寧皆因險之時以成險之用
也顧不大矣哉按信與剛中是明處險之道設險守

國是明用險之方處險有其道則義命自安雖居患
難之中無入而不自得用險有其方則形便已據雖
有卒然之虞預備而可無患然山川城池特設險之
一端耳若夫尊卑之等貴賤之分明等威異物采凡
所以杜絕陵替限隔上下者此誠體險之大用而所
謂地利不如人和也用險者尤宜留意歟

象曰水洊至習坎君子以常德行習教事

此象傳是言君子法習坎之義而得治己治人之道

也洊至流而不息也常久也孔子釋坎象曰水流洊
至兩坎相習之象君子體之取水之有常以常德行
必思所以茂正三德崇脩六行而學之不厭則理義
熟於身心而治己之功備矣取水之洊習以習教事
必先使之既安其教又服其事而誨之不倦則政令
熟於觀聽而治人之道畢矣皆洊習之意也從來險
難皆起於人事故治己治人為有天下之要務德行
不常則有初鮮終私欲橫起遇險而不能自持者有

之矣教事不習則始勤終怠奸宄萌生當險而不能
肆應者有之矣然人君必先慎脩於上日就月將而
後海內回心向道風移俗易不待勢制威禁自然相
觀而化則治已又為治人之本也

初六習坎入于坎窞凶象曰習坎入坎失道凶也

此一爻是言處重險之下而失濟險之道也窞坎中
之陷處周公繫坎初爻曰初本陰柔之質無濟險之
才處重險之下無濟險之勢上無應援無濟險之人

是其志氣昏愚所為拂亂非徒不能出乎險也惟益
陷於深險耳為在習坎之中而又入於坎窞之象如
是則墜於重淵載胥及溺而已其凶可知孔子釋初
象曰惟陽剛乃可以出險初以陰柔而居習坎之下
是失其陽剛之道而其陷益深矣所以有入于坎窞
之凶也蓋平陂之形雖在於世而趨避之方則操乎
我故最凶莫如坎之初而聖人示之曰失道可見雖
在重險之下非無出險之道乃人自失其道而後至

於凶此君子之所為惡居下流也

九二坎有險求小得象曰求小得未出中也

此一爻是言二身處險中雖具剛中之才而僅足小有濟也小得言未大也中謂二陰之中周公繫坎二爻曰二當坎險之時陷於上下二陰之中乃至險之地有險者也幸以剛居中是有孚心亨之人而肩濟險之任宜若可出險而無難然處勢艱難人情阻拂當此者僅可小有所得以為出險之地若欲遽進以

求出乎險則將至於三之往來皆險而入于坎窞而
已孔子釋二象曰所謂小有得者非二之才德不足
以濟險也以一陽方為二陰所陷在險之地是時尚
未能出乎險中而不可大有得也大抵氣數一定雖
聖人不能與之爭然具剛中之德處險阻而得其道
則氣數亦不得而終困之曰小有得者非貪苟安而
已遵時養晦見可而進其亦有不得不然者乎

六三來之坎坎險且枕入于坎窞勿用象曰來之坎坎

終无功也

此一爻是言三上下皆險而無濟險之才也來謂就下之謂往上枕倚著未安之意周公繫坎三爻曰三以陰柔不中正而履重險之間是以委靡之質而當大難之衝其進與退皆無足據者也來亦遇坎之亦遇坎來下則入乎險之中之上則如枕重險焉所處如此則前後皆險舉足蹈危必入于坎中之窞而不能出也禍患已深雖來與之安所用哉孔子釋三象

曰所謂來之坎坎者三之心豈肯終於坎哉特以其
陰柔不中正雖處平易尚難克濟況履險乎徒見其
憧憧往來而終無出險之功也按險為陷人者也而
三之陰自陷險中至於局天踏地進退維谷嗟乎陽
之陷也猶可小得既平陰之陷也一敗塗地而已矣
彼陷人者徒自陷耳可不懼哉

六四樽酒簋貳用缶納約自牖終无咎象曰樽酒簋貳
剛柔際也

此一爻是言四居濟險之任惟忠順以事上也樽以

盛酒簋以盛食貳益之也缶即酌器也為樽之副牖

室之受明處象曰樽酒簋貳之貳疑衍剛柔指四與

五際即交際之際周公繫坎四爻曰四以陰居柔下

無應援非能濟天下之險者但以其身居大臣之地

而當險難之日則上之倚毗於已者倍切於常時故

必去虛文捐形迹惟益勵其忠實之心以為事君之

本而其進結於君也又必因君之所明以祛其所蔽

庶不至任質而疑於慙也為樽酒簋貳用缶納約自
牖之象如是則君必信吾心而用吾言以濟其險也
夫豈有慙慙為忠益而反以為咎乎終必无之矣孔
子釋四象曰所謂樽酒簋者蓋以險難之時非誠實
不足以固其君臣之交故五以剛而下交乎臣四以
柔而上交乎君則精神相通形迹俱捐剛柔自是相
際而成濟險之功矣按君臣相遇自古為難而四與
五不事多儀即可交合者蓋時當無事勢分之相隔

故君臣之合常見其難運值多艱緩急之相須故君

臣之合偏覺其易四與五在險難之中剛柔相濟臣
固切於上交君亦勤於下接宜其作合之易也方之
在昔肅宗之於李泌德宗之於陸贄庶幾似之然贄
從其君於多難之日計無不從及禍患寢平一抗直
言而遽罹斥逐豈其有乖納牖之道乎信乎君臣之
合似易而實難也人主誠深念乎此則其臣自不至
信而被謗忠而見疑矣

九五坎不盈祇既平无咎象曰坎不盈中未大也

此一爻是言五才足濟險而又有出險之機也祇抵也中謂剛中周公繫坎五爻曰五在坎之中未離乎險者也然以剛中之才而居尊位其才其勢俱足以濟險而又時將出險則有可濟之會是以有孚心亨之君而肩濟險之責必漸至於險者使易危者使平猶坎陷之中雖未至盈而出然已至於平而將盈矣夫險患其不平耳既平則險必可濟又何咎之有哉

孔子釋五象曰天下之險一日未去則人君之德一日未大五之坎尚不盈時為之也其未大者乃時之掩乎中而非中之不足濟乎時也按二五皆有剛中之德可以出險而二曰坎有險五曰坎既平者蓋險有能濟之道又有將濟之時二在下坎之中德雖具而位未隆是以猶為重險所困也五在上坎之中德位俱隆而時亦將出重險之外矣要之時不可必而道當自盡此所以必有孚心亨而後行有尚也可不

勉歟

上六係用徽纆寘于叢棘三歲不得凶象曰上六失道凶三歲也

此一爻是言上居險之極而終於莫濟也係縛也徽三股索也纆兩股索也寘拘也叢棘重險難脫之地或謂即後世所云棘寺也周公繫坎上爻曰上以陰柔而居險極是其才不足以濟險而又當存亡危急之秋身在險中為險所陷而終無出險之日者也為

係用徽纆寘于叢棘之象夫係之寘之所處之困迫何如而至於三歲之久猶不得免則陷溺之深而凶可知矣孔子釋上象曰上六所謂凶三歲者何哉蓋出險以陽剛為道今以陰居柔才弱莫濟全失其處險之道矣宜其久而終至於凶也按初上二爻包坎體四爻之外是六爻中陷坎之最甚者然聖人視此不以為天運之適然而必責以人事之當然故始終以失道儆之若險未嘗陷人而人自陷夫險者其勉

人以自強之心可謂切矣



離下
離上

離麗也以其一陰附麗於二陽也又明也以其中虛則明也離為火以火體本虛麗於物而始明也彖傳釋卦辭惟在正以出之而順以成之故成炳照萬物之功六爻之中惟九三盛極將衰有不能知止之戒六二則言臣道之能將順也上九則言君威之能不振也初爻持之以敬則無咎四爻迫之以剛則終凶

所為敬勝者吉而太剛者折也至於五爻能以憂危之心收大權而保天祿此堯舜所以勤吁咈而湯武所以勗銘誥歟按文王序上經始之以乾坤而終之以坎離者以坎得乾之中畫離得坤之中畫故坎離者天地之心也坎藏天之陽著明為月離麗地之陰含明為日坎水主北方而司寒離火主南方而司暑月則司夜日則司晝自太極既判兩儀化育以後凡水火日月之用寒暑晝夜之運莫非二卦之所包蘊

帝王體之以治天下則裁成輔相之道以立聖賢體之以治一身則動靜通復之理以明洵乎易道之微為能範圍天地而不過矣

離利貞亨畜牝牛吉

此卦上下皆離陰麗於陽附麗之義故名為離卦辭言附麗乎人之道既貴於正而又必出之以順也牛順物牝牛順之至者也文王繫離彖辭曰凡人莫不有所附麗未附麗之先交不可妄投既附麗之後情

不可乖隔故遇合之始必出之以至正而利於貞焉
則道德可以相贊功業可以相資何亨如之然正者
易於相忤又必謙卑以自牧柔遜以相先而處其至
順如畜牝牛然庶幾在己無違在人無拂而得吉矣
此可見貞而能順則貞不失之激順而能貞則順不
流於諂此附麗之善道也按離之為卦一陰麗乎二
陽陽者君道陰者臣道故多主臣麗君而言然臣可
以上麗乎君君亦可下麗乎臣為君者黜邪佞登忠

良慎之於始矣而既得賢臣則卑躬以隆其體虛懷以盡其情又極延攬之誠焉此君之善乎麗臣也為臣者進以禮退以義謹之於初矣而既事聖主則將順以昭其美委曲以殫其忱又極納牖之道焉此臣之善乎麗君也三代以下人主巍巍於上百僚唯唯於下君側多狎昵之人盈庭工諛媚之習知此者鮮矣欲求合夫麗之義必交盡其正且順而可哉

象曰離麗也日月麗乎天百穀草木麗乎土重明以麗

乎正乃化成天下柔麗乎中正故亨是以畜牝牛吉也
此彖傳是釋離彖辭以明天地君臣各得其所麗之
道也重明主人君言明而又明明之不息也正者明
得其正不為苛察柔麗乎中正指六二言孔子釋離
彖辭曰卦名離者附麗之義也推之人物莫不各有
所麗故日月麗乎天是物之成象者有以麗而明也
百穀草木麗乎土是物之成形者有以麗而生也大
君者位天地之中而為天下之主豈無所麗乎將見

人君智周萬物而行所無事推見至隱而不尚苛察
是重明以麗乎正也由是一明無不明一正無不正
百度惟貞庶績咸熙乃化成於天下矣是君之出治
有以麗而成也三才之各有所麗如此此離之名所
由取也辭曰利貞亨畜牝牛吉者蓋人君以重明之
德作之於上人臣當以中順之德附之於下卦之六
二柔麗乎中正則是人臣麗重明之君也不驕不亢
有恭敬之美而又裁之以中行之以正不流卑諂之

私惟中正也則有貞之義矣故亨惟柔也則有畜牝牛之義矣故吉蓋惟君之重明而後可以配天地惟臣之柔正而後能佐人君此上下之相與有成也歟按程傳以重明麗正柔麗中正皆兼君臣言竊謂重明即大人之繼明豈有臣之明而敢與君之明亢者且二五雖皆柔中而五所居未正二正而且中則柔麗中正似專指黃離之臣為得也蓋人君一日萬幾非重明不足以辨忠佞非居正不足以式臣民故專

屬之君人臣仰事一人非柔則失之專而必至分君之明非中正則失之諂而不足以承君之明故專屬之臣如是則明良會合心志一而功業成矣

象曰明兩作離大人以繼明照于四方

此象傳是言大人自純其明德之功而光被乎世也作起也繼明以明相續也孔子釋離象曰上下皆離明而重兩相繼而起重離之象也大人法離明相繼之義以緝熙厥德則本體有純一之休以覃敷厥世

則四方無闇汶之氣在大人止自繼其明耳而文明之化所以照於四方者已具足於大人明量中矣離明之學非大人孰能與於斯按易卦大象或稱君子或稱先王或稱后惟離稱大人蓋明明德者大人之學也繼明即明明德之義此千古聖學相傳之大原也然離之所以繼明者由乾再索於坤而得其中畫六二敬以直內義以方外則體用無不明矣六五黃中通理正位居體則表裏無不明矣明兼體用徹表

裏則己之德明而即可明明德於天下光輝所發無遠不屆其照四方也宜哉

初九履錯然敬之无咎象曰履錯之敬以辟咎也

此一爻是言人之不可易於處事而當敬以持之也履在下之象錯然紛錯之貌周公繫離初爻曰初以剛在下而處離體剛德好動則果於任事離性炎上則喜於麗人是其急於所履而不顧事機之紛錯者也故有履錯然之象夫初在下而跡已動動則失在

下之宜而有咎也然其剛明之才若知其義而敬慎之則心有主而動不妄履錯之咎何自而至矣孔子釋初象曰履錯然欲動而必以敬者蓋以初居離始所履之善惡邪正紛錯交進莫知適從敬則可以慎其所履而避咎耳苟其敬之雖履錯然庸何咎乎蓋天下是非得失本屬一定之理然有平時見之甚明而臨事忽迷謬者此非不明之咎蓋明而不敬之咎也聖人於未明者教之以明於已明者教之以敬假

使致知明善以後不加以謹幾慎獨之功則高明者之失足與卑暗者之妄行何異乎敬之一言通於六位而特舉初以槩之所謂必敬其初而後能敬其終也六二黃離元吉象曰黃離元吉得中道也

此一爻是言人臣能以中正之道而上麗乎其君也黃中色文之美也黃離美之盛也周公繫離二爻曰二以文明中正之德而上麗於文明中順之君是人臣之麗君也將順而濟以匡救渾厚而出以精明所

稱臣道之最中者矣故為黃離之象當是時祇見其居中而運絕無功烈之可見而繼明之主德自昭化成之美俗自洽君都臣俞而四海從欲嚮風大善而吉之道也孔子釋二象曰所謂黃離元吉者蓋黃中色也二居中而麗五是其所以事君者皆得中道而無過不及之差者也惟其為道也能合乎中道故其為離也有取於黃離而元吉之效誠非倖致矣按六二之離則其明也黃則其文也文明由中道而發則

其明非一偏之見其文皆至德之光所謂美在其中而暢四肢發事業者也重明之主將以明照四方化成天下必有文明中正之臣為之宣布於下非如六二者疇克勝其任乎

九三曰昃之離不鼓缶而歌則大耋之嗟凶象曰日昃之離何可久也

此一爻是言人當安常以貞遇而戒徒憂者之無益也缶常用之器周公繫離三爻曰以理言之盛必有

哀以數言之生必有死此人之大常也三居下體之
終是前明將盡盛極將衰之候故為日昃之離當此
時也智力既無足恃時會亦難強爭倘不安氣數之
常以自適而戚戚於危亡之憂以為旦夕莫保之計
如不鼓缶而歌則徒大耋之嗟然竟何益哉祗速之
斃耳凶之道也孔子釋三象曰離未至昃猶或可久
既昃矣則盛極將衰何可久也明者知其然安常處
順又豈足以為凶乎按傳曰有德則樂樂則能久孔

子發憤忘食樂以忘憂不知老之將至衛武公年九十五猶使人日箴戒於側作詩自勵云借曰未知亦聿既耄聖賢以及時聞道為樂以永不聞道為憂豈有教人以時數將盡以樂消日之理乎此文之旨亦言人之道德功業返諸己者無憾然後可居易以聽其自然所謂脩身以俟之耳非一無所用心而徒委諸氣數之謂也

九四突如其來如焚如死如棄如象曰突如其來如无

所容也

此一爻是言四以剛侵上而不容於世也突如其來
言猝至也无所容言焚死棄也周公繫離四爻曰九
四當後明將繼正天命重回之會人心始向之秋宜
以順而動徐以定之可耳而乃以剛迫之狹陋前人
之規盡行一己之志更張太驟突如其來如者也則
激而生變而厲階之作災必逮夫身矣是固以剛自
敗者其諸以火自焚者乎焚則死死則棄矣孔子釋

四象曰突如其來如者四之過剛太銳犯順已極宜其不戢而自焚受禍既酷而公論不予天下之所不容也按剛所以持正也剛而犯上不正莫大焉居大臣之位而不避僭逼之嫌其能遠不敬之誅乎漢景帝謂周亞夫意怏怏非少主臣史稱霍光之禍萌於驂乘此二臣者才德出衆功冠一時然皆不免突如其之戒以至殞身滅宗故知牝牛之義為人臣者尤當三復也

六五出涕沱若戚嗟若吉象曰六五之吉離王公也

此一爻是言五明於保位之義而出之以憂懼之心也離即麗也周公繫離五爻曰五以柔居尊而麗乎中有文明之德可謂繼明之善者矣然處不得其正而迫於上下之兩陽是主權將至下移而國柄慮其倒持者也幸明德在中故能反躬自治而憂深慮遠既出涕沱若而憂形於色又戚嗟若而憂聞於聲謹畏如是庶君德克昭奸萌潛杜收主權而固天位吉

莫逾焉孔子釋五象曰六五以君而下迫於臣位亦
殆矣而言吉者以其存憂畏之心則所行自無乖戾
之失有以麗於王公之位而永保天祿也按多難可
以興邦殷憂所以啟聖古之明主惕心危慮兢兢若
不自保而卒能抑奸暴之志收天下之權皆自此一
念致之也不然六五為離明之主何由至於出涕戚
嗟乎繼明而戚與方蹶而泄其得失正可參觀矣

上九王用出征有嘉折首獲匪其醜无咎象曰王用出

征以正邦也

此一爻是言剛與明交濟故能行師而奠邦也折首
誅其首惡也醜類也周公繫離上爻曰上九以陽居
上在離之極剛明之至者也惟剛明則可以及遠故
王者用此道以出征則能戡亂止暴以享有嘉美之
功然剛極則無所縱舍明極則無所掩匿苟不約之
以中則剛而失於過嚴明而病於過察矣故其出征
也但折取其首惡之人而威自震獲匪其從亂之類

而刑不濫既不至養奸以怙亂又不至縱暴而寡恩
大慙斯拔羣心傾服而共臻化成之治又何咎焉孔
子釋上象曰王用出征匪以黷武也誠念邦之不正
由寇賊亂之耳一出征而除暴止刑乃所以綏正其
邦國也按繼體之君尤重征伐之事有扈之師啟所
以承禹也商奄淮徐之征成王所以繼武也周公作
立政終之曰其克詰戎兵以陟禹之迹召公告康王
亦曰張皇六師無壞我高祖寡命蓋不如是不足以


奮揚威武而救陵遲之漸此正邦之王必以出征為
急也後世上下苟安口不言兵甚至武備廢弛外寧
而遂忘內憂者亦獨何哉


日講易經解義卷七

謹案第三十頁後七行虎視眈眈刊本眈眈從耳
旁下同據經典釋文改

第三十五頁後七行棟橈刊本橈訛作才旁下同
今據注疏經典釋文及朱子本義改

第五十頁後一行教事不習刊本習訛常據經改





總校官庶吉士臣侍朝

校對官檢討臣龔大萬

膳錄監生臣杜成